

皇朝藩部要略

皇朝藩部要略卷之十

前史官壽陽 祁韻士 纂

寶山 毛嶽生 編次

江陰 宋景昌 校寫

平定 張穆 覆審

厄魯特要略二

三十四年二月。噶爾丹遣使入貢。疏言使臣馬迪被害。不獲詳知。難于覆奏。所云約地會盟之事。俟後奏聞。請將喀爾喀七旗發回故土。哲卜尊丹巴及土謝圖汗二人亦仍照前奏。

上賜敕切責之。且云：嗣後若仍怙非不悛，蔑視前諭，永勿上疏，遣使貿易。七月，噶爾丹復遣使上疏，奏如前。敕責之。

三十五年三月丙辰。

上親征噶爾丹六軍啟行。先是噶爾丹自烏蘭布通敗遁後，仍侵掠喀爾喀，潛入巴顏烏蘭地。

上密諭科爾沁土謝圖親王沙津，遣人誘之。噶爾丹果沿克魯倫河而下，掠喀爾喀納木札爾陀音，遂踞巴顏烏蘭。因

命安北將軍伯費揚古爲撫遠大將軍，從歸化城進發。

揚威將軍舒恕安西將軍傅霽振武將軍孫思克等由鎮彝取昆都倫一路俱於二月二十日前後起程

此皆西路

上自統中路大兵出獨石口將軍薩布素統盛京甯古

塔黑龍江科爾沁兵沿克魯倫河進

此東路

命安郡王瑪爾琿統土默特兵防歸化城夏四月

上駐蹕什巴爾台

遣諭噶爾丹曰汝當親至與朕定議否則以阿喇布坦等爲使時噶爾丹屯兵克魯倫之克勒和碩聞

駕至懼夜遣人赴巴顏烏蘭召阿喇布坦與謀五月丙辰朔

上駐蹕拖陵布喇克。

遣使以兵二百，偕所獲厄魯特四人齎。

敕書賜物諭降。至克嚕倫河，丹濟拉率千餘騎突至，欲奪前鋒馬。我使叱曰：爾等何得無禮。

上率師親至矣。西路大將軍費揚古亦自鄂爾坤圖拉且來。丹濟拉駭失聲，馳語噶爾丹。阿喇布坦亦曰：

天朝兵威，誰不之知。是不可與戰。噶爾丹益懼。壬戌。

上躬率兵前行，諸軍以次進發。抵克嚕倫河，噶爾丹盡棄廬帳器械，竄甲子。

上親率前鋒兵窮追，噶爾丹倉皇遁走。丁卯。

命領侍衛內大臣馬思哈爲平北大將軍率師追剿。上班師駐蹕克勒和碩。噶爾丹竄至特勒爾濟口。費揚古自西路迎擊。及之於昭莫多。噶爾丹率賊萬計逆戰。自未至酉大敗之。殺噶爾丹妻阿努。及賊渠甚衆。噶爾丹引數騎逃去。癸酉捷音至。

行在六月癸巳。

上還宮。明日行慶賀禮。丹濟拉阿喇布坦丹津鄂木布等與噶爾丹相失。阿喇布坦集殘衆赴博囉河偵噶爾丹。丹匿塔密爾之台庫勒。問道往會。尋丹津鄂木布等與噶爾丹爭收有隙。棄之。丹濟拉獨從噶爾丹至庫倫。伯

勒濟爾復以兵千五百掠瀚海游牧之喀爾喀有津巴者丹濟拉屬爲喀爾喀阿爾薩蘭衛宰桑擒獻

上命遣歸招噶爾丹降至阿濟爾布納遇丹濟拉語之且曰

上遣兵分備邊汛矣丹濟拉遁詭遣察哈岱乞降聞我儲糧翁吉謀往奪會副都統祖良璧撤兵歸行未數里丹濟拉伺前軍過驟劫輜重祖良璧自後馳至前軍旋擊敗走先是丹濟拉以奪糧爲非計從者曰與其餒而死不如盜而生丹濟拉強應之約曰勿殺人但掠食耳至是爲護糧軍所敗失乘騎丹濟拉撫膺嘆曰欲向清

水求魚。水已濁。魚終不可得。奈何。遂率眾竄就噶爾丹。噶爾丹懊語曰。我恃汝爲命。汝今若此。將何以存。不得已。將往哈密。以馬易粟而食。旣而偵我軍設哨嘉峪關外。弗敢往。走格格特哈朗古特薩克薩特呼里克伯格爾察罕額爾克等處。丹濟拉說噶爾丹。遣格類固英來乞降。時準噶爾諸台吉。皆叛棄噶爾丹。惟丹濟拉尙從之。丹津鄂木布之棄噶爾丹也。約阿喇布坦偕行。阿喇布坦亦棄噶爾丹去。由吉齊根特轉徙札布堪之濟思布隆珠爾庫珠等處。與噶爾丹相避行。噶爾丹復自伯格爾察罕額爾克。遣宰桑車凌布木召之。阿喇布坦不

往徙牧布顏圖果爾。初其屬有內附者曰羅卜藏班珠爾。請往說阿喇布坦降。

允之。復以阿喇布坦妻曰札爾爲喀爾喀右翼札薩克圖汗成袞女。喀爾喀親王策旺札布郡王袞布固嚕什喜皆其姻戚。

詔遣屬往招之。降時阿喇布坦及丹津鄂木布謀就策妄阿喇布坦以前憾不果往。

敕曰。朕統大軍敗噶爾丹兵。丹巴哈什哈沙克珠木等接踵歸誠。俱已授爵秩給衣食。今朕復親統六師調各路兵協剿噶爾丹。倘不來降。必窮之於其所往。爾阿喇

布坦及丹津鄂木布前雖附噶爾丹。然非倡亂之人。今來降者。皆云爾等與噶爾丹分析各居。朕嘉爾猶知天道。能自振拔。憫爾牲畜被俘。衣食已絕。特遣使往諭。其札薩克圖汗之子策旺札布先經離散。朕已收歸。封親王爵。覓伊妻母。令與完聚。頻加撫恤。頃又擇地賜牧。使安生業。爾其知之。敕至。爾卽率眾來歸。前附噶爾丹罪。朕不之究。必待爾以富貴顯榮。爾之部眾亦令妻孥完聚。各得生業。爾若尚有疑懼。前策妄阿喇布坦使至時。請朕弗討爾罪。令往與會。朕以策妄阿喇布坦遣使納貢。敬慎有加。深加憐惜。爾若往附策妄阿喇布坦。朕不

究詰倘不擇斯二者。徼倖于額克阿喇勒洪郭爾齊斯。希等峻險之處。棲身苟免。朕必往討。爾其早作良圖。

上不忍盡剿厄魯特眾。既遣使往招阿喇布坦及丹津鄂木布復。以丹濟拉獨爲噶爾丹所信。

賜噶爾丹敕。以丹濟拉名次之。再使諭降。至是復

遣格類固英從我使往。

敕曰。爾噶爾丹及丹濟拉。如果引罪來降。朕無異視。務令得所。爾屬人等。亦得各安生業。朕斷不念舊惡。試自計之。有能收養爾等之人否。今已無所歸矣。其速率屬來降。若仍誤聽匪言。後悔難追。毋疑勿懼。博碩克圖濟

農初以噶爾丹女布木爲子根特爾婦。屢使通問。及大軍征噶爾丹時。獲其通噶爾丹使羅壘額木齊及善巴于軍。

詔羈羅壘額木齊于宏仁寺。以善巴從我使齋。

敕諭博碩克圖濟農及薩楚墨爾根台吉曰。爾青海厄魯特。尊崇達賴喇嘛法教。敬事本朝。聘問貢獻。恭順有年。朕亦頻加恩賚。乃噶爾丹違達賴喇嘛法教。不遵朕旨。朕統軍至圖拉。剿而滅之。博碩克圖濟農等。遣往噶爾丹使。爲朕所擒。俱言達賴喇嘛脫輜已久。第巴匿之。且噶爾丹詭言青海諸台吉。謀與彼同犯中國。今噶爾

丹亡命西走青海諸台吉如欲仍前修睦其各防邊界
遇噶爾丹卽行擒解若知而故縱此後永讐絕之我使
至察罕托羅海宣諭

敕旨善巴陵堪布遂召青海諸台吉集盟壇言噶爾丹
殺鄂齊爾圖汗我等與讐但素奉達賴喇嘛言應遣議
時達賴喇嘛示寂久唐古特達賴汗尋約和碩特八台
吉遣使慶捷善巴陵堪布蓋唐古特達賴喇嘛遣理青
海蒙古務者達賴汗卽鄂齊爾圖汗子世長唐古特鄂
齊爾圖汗弟滾察琿無嗣外餘八人皆居青海故其裔
稱和碩特八台吉噶爾丹旣敗竄副都統阿南達奉

命設哨以和囉理屬分屯額布格特阿木格特崑都倫額濟內及布隆吉爾之博羅椿濟敖齊喀喇莽奈諸地和囉理復督兵千餘赴阿爾台之土魯圖防緝時噶爾賈多爾濟竄徙嘉峪關外有哨卒拜格者其屬也阿南達召至遣歸說噶爾賈多爾濟曰

上待汝恩甚厚將撫育之顧叛逃可乎和囉理棄牧時汝不能戢屬故從往

上灼知汝情念汝祖鄂齊爾圖汗將玉成汝汝其思之噶爾賈多爾濟還報曰

上念臣祖臣兄令臣與和囉理接壤居臣情無知從和

囉理叛遁。今悔罪欲死。臣幼。臣母一婦人。未能達。乞以情代奏。阿南達欲堅其內附志。遣歸約如期會肅州。

諭設哨援哈密。復檄哈密伯克額貝都拉曰。噶爾丹至汝地。汝卽召噶爾丹。多爾濟往援。勿復疑。噶爾丹多爾濟旋遣宰桑阿約等齎降表至肅州會。

上視師甯夏。阿南達馳疏至。

詔優恤所部眾。唐古特部第巴比噶爾丹。煽青海薩楚墨爾根台吉。以兵萬餘屯雜谷桑湯。對河諸番地。爲觀望計。謀噶爾丹敗遁。乃歸。土爾扈特汗阿玉奇之女。爲策妄阿喇布坦妻。其第三子散札布率屬從往。阿玉奇

聞噶爾丹收走遣宰桑多爾濟札布以所部兵千防諸阿爾台之士魯圖策妄阿喇布坦復遣散札布攜兵二萬往會第巴陰阻之遂還杜爾伯特台吉綽克圖避噶爾丹亂奔依青海衮布邊吏往詰以情告

詔弗究阿南達擒青海之使自噶爾丹所歸者于素爾河曰阿勒達爾宰桑以聞青海墨爾根台吉卒子納木札勒自號額爾德尼奏請襲祖父號并求黃草灘地諭曰納木札勒著仍以土謝圖岱青號賜之至黃草灘既定爲內地所請不允

三十六年春遣官招降青海納木札勒從其叔祖達什

巴圖爾入覲

賜宴保和殿

召升陞飲以

御用冠服及銀幣賜之。我使至噶爾丹所，復宣諭使降。丹濟拉私告格類固英曰：我說噶爾丹降，不從。反疑我。爾復說之降，則我爲使往。格類固英知噶爾丹無降志。從我使歸。丹濟拉密陳欲降狀，尋以責噶爾丹僕。反顏。從牧齊察蘭什爾哈戈壁等處相避行。噶爾丹復自薩克薩特呼里克竄哈薩克圖哈喇阿濟爾罕。數召丹濟拉不往。

上聞之。

詔察哈代出招降丹濟拉。

敕曰。朕爲天下元后。善善惡惡。乃至理也。前遣格類固英等。賜敕內開載爾名。復使格類固英傳諭爾降。今格類固英等至。爾之辭意。皆已備陳。爾能致噶爾丹降。必當封爾爲多羅貝勒。畀以殊榮。如不能致。爾但束身來歸。亦不失爾富貴。况爾屬人乞降者。朕皆有罪。顯榮優養。爾應悉聞。往咎概不介意。爾曾密奏。若宥臣罪。臣卽歸誠。故特專賜爾敕。盡宥爾罪。朕爲大君。豈改成命。會噶爾丹召丹濟拉。以私恩不忍絕。復往會于阿察阿木。

塔台策旺札布屬奉

敕至阿喇布坦所授之阿喇布坦及其妻願遵

旨內徙以噶爾丹介居請徙近策妄阿喇布坦牧時丹
津鄂木布居吹河阿喇布坦遣告之各使齎奏至然不
卽降復

敕其使諭之會噶爾丹自哈薩克圖哈喇阿濟爾罕遣
使土克齊色稜達什召阿喇布坦不赴且奪召者騎自
布顏圖果爾徙阿爾台之喀喇伊齊思呼里木圖等處
噶爾丹欲踰阿爾台至額克阿喇勒捕魚食慮阿喇布
坦襲之不果丹津鄂木布尋奔附策妄阿喇布坦所阿

喇布坦仍分牧游行哈密俘噶爾丹子色布騰巴爾珠爾及其屬以獻噶爾賈多爾濟詣阿南達告曰噶爾丹不共戴天讐也願效力從戎荅

殊恩且復私讐待軍事戲乃入覲阿南達以聞

允之噶爾丹遣使說噶爾賈多爾濟曰爾姊阿努存日言必以我女鍾濟海妻爾今阿努歿爾娶我女與否其自爲計策妄阿喇布坦貽之書曰我等向爲姻戚噶爾丹行不義致棄前好今遣使招爾特爲誑爾計爾勿妄從未幾唐古特部第巴煽青海諸台吉盟于察罕托羅海繕軍械助噶爾丹檄噶爾賈多爾濟以兵往辭不赴

遣使俄濟通問策妄阿喇布坦自攜兵百會阿南達于
布隆吉爾。

上以青海未附故復遣羅壘額木齊阿勒達爾宰桑等
從我使往招博碩克圖濟農及諸台吉來歸會河州副
將李鳳翔遣使博碩克圖濟農所以其私謂之曰爾爲
噶爾丹姻蓋說之降羅壘額木齊等歸牧博碩克圖濟
農喜謂其子根特爾曰我使被擒謂戮之矣不意蒙
恩釋歸眞仁聖主也使者言誠是乃遣阿勒達爾宰桑
等至將軍孫思克所稱願往說噶爾丹降思克馳奏
諭曰此雖博碩克圖濟農欲圖報效但噶爾丹降與不

降豈係此遣使往說爲也。況朕已發大兵分路進剿，博碩克圖濟農使者著遣歸。博碩克圖濟農者，顧實汗第五子伊勒都齊子也。青海哀布遣宰桑馮木特至，先是遣使。

諭策妄阿喇布坦絕噶爾丹道，經嘉峪關外，哀布助糧，揆駝馬且爲導，令得達。至是奏游牧邊外久不敢萌異志。數年來青海諸台吉私盟皆未敢與，請

賜內附。時額駙阿喇布坦都統都思噶爾巴林台吉德木楚克西甯喇嘛商南多爾濟等遵

旨招降青海，復以哈密達爾漢伯克額貝都拉內附。

詔敕青海厄魯特勿擾哈密境行有期

詔攜袞布使往復

賜諭獎之袞布者顧實汗第三子達蘭泰子也時多爾濟前卒策旺喇布坦代已久和碩特八台吉集盟壇我使諭之曰達賴岱青當以身入朝否則遣子弟代蓋以多爾濟子故重之策旺喇布坦尋入覲

優賚遣歸阿喇布坦等至察罕托羅海察罕諾捫汗迎告曰

皇上令青海眾得享安樂永受恩澤何幸如之遣禡木特馳語袞布會袞布以建達賴喇嘛塔故遣長子額爾

德尼額爾克托克托爾赴察罕托羅海中道聞達賴汗子拉藏將以兵襲己懼歸。袞布復遣次子朋素克往拉藏讓之曰。爾父私遣使內附。非欲貳青海乎。將興兵與爾父構難。朋素克馳歸語故。袞布備兵待。復遣禡木特迎告我使曰。若不先臨我地。諸台吉疑自息。阿喇布坦等恐諸台吉不利之。從禡木特言。拉藏尋遣語袞布曰。爾獨希寵。

天朝非所宜。我將偕青海諸台吉內附。因撤兵。時顧實汗子惟達什巴圖爾存。阿喇布坦等宣諭之。達什巴圖爾議遣博碩克圖濟農及額爾德尼台

吉代入覲。額爾德尼者名納木札勒墨爾根台吉子也。
阿喇布坦等語曰。

皇上駕臨甯夏。爾當率眾往朝。毋自悞。達什巴圖爾偕
察罕諾捫汗善巴陵堪布及唐古特達賴汗子拉藏等。
檄諸台吉議約。四月啟行。達爾寺垂藏呼圖克圖溫都
遜寺達賴綽爾濟喇嘛及囊素通事等咸請從。私向使
者問獅象狀。相謂曰。我等往朝。殆必以所未見聞物相
示。三月。

上由歸化城視師甯夏。閏三月。阿喇布坦等自青海歸。
議台吉至。若露處未協朝典。應令秋後入覲京師。

詔如議。

命都思噶爾商南多爾濟留駐鎮海堡俟之。扈

蹕諸臣奏青海厄魯特與準噶爾同部聞噶爾丹敗竄咸驚懼。

皇上定策安集所部身至如歸誠非常舉請行慶賀禮諭曰青海職貢有年來朝亦常事耳可勿賀諸臣固請因奉表賀曰青海向雖修貢未隸臣屬今諸部歸誠噶爾丹益無竄路。

皇上安內攘外之心自此允愜矣十三日噶爾丹至阿察阿穆塔台飲藥自盡丹濟拉以噶爾丹骸及女鍾濟

海至巴雅恩都爾遣齊奇宰桑詣大將軍伯費揚古告降以前不速降故懼討復馳鼠布隆吉爾爲待

命計偵副都統阿南達設備奔巴里坤億甚集從者議所向咸稱留處便先是噶爾丹兄子策妄阿喇布坦與噶爾丹修怨徒博囉塔拉達爾札札木揚等皆從之丹濟拉以附噶爾丹故與策妄阿喇布坦交惡至是謂從者曰爾等徒自謀耳若策妄阿喇布坦知而阻我則難爲計矣因游行博克達額琳哈畢爾噶境至濟木薩遇策妄阿喇布坦之郭蠻喇嘛將以兵拒給之曰噶爾丹已歿吾欲往投策妄阿喇布坦其遣爾屬偕我使往郭

繼喇嘛撤兵。丹濟拉遣從者土克齊哈什哈。偕郭蠻喇
嘛使達爾漢宰桑。往告策妄阿喇布坦。而自偕郭蠻喇
嘛駐待德伯色克。

上以丹濟拉既乞降。復竄徙。

詔策妄阿喇布坦擒獻策妄阿喇布坦憾丹濟拉。且慮
討不聽。

命罪遣族台吉大策凌敦多卜等兵擊之。齊奇爾宰桑
既乞降。費揚古遣人覲。復令準噶爾降人丹巴哈什哈
往諭丹濟拉曰。爾來歸甚善。所需糧騎若何。當遣往。何
不輕身先至。令屬眾自後徐行。丹巴哈什哈至。巴雅思

都爾則丹濟拉竄已入察哈岱齊奇爾宰桑後先抵軍費揚古今齋前

敕往諭不之遇復給糧騎遣往令必與丹濟拉相見始歸抵郭蠻喇嘛所授之

敕丹濟拉乃決志降挈裝就道大策凌敦多卜以兵至掠噶爾丹骸及鍾濟海去丹濟拉馳赴哈密子多爾濟色布騰爲大策凌敦多卜兵所掩與相失越九日乃至達爾漢伯克額貝都拉迎諸境遣子郭帕伯克護至內汛時

上駐蹕可汗特穆爾嶺

遣官往迎丹濟拉至

召入行幄屏左右

垂詢移時始命出

詔以丹濟拉爲內大臣多爾濟色布騰爲一等待衛其
從眾置張家口外視可用者給軍糧丹濟拉出語人曰
我乃叛逆罪人窮始來歸

皇上略不致疑屏侍臣召入見且蒙

恩授顯爵

聖主至勇至仁如此令我誠心感戴永不敢異志矣杜
爾伯特部台吉車稜來歸車稜者阿勒達爾泰什孫也

父烏爾袞從噶爾丹侵喀爾喀烏蘭布通之役爲大軍所敗攜屬三百餘竄圖拉河境

上聞之

諭遣護軍統領瑪喇曰爾等馳赴圖拉遣人問故伊等或欲內附懼爲喀爾喀阻或力不能至而在彼可收之至如欲往阿爾台則聽之既不內附又不前往則當相機行事瑪喇至偵不獲蹤噶爾丹再侵喀阿喀烏爾袞復從至和託輝特台吉根敦陣斬之車稜從噶爾丹竄牧巴顏烏蘭根敦以告

詔使諭車稜降不至噶爾丹尋敗遁車稜將乞降我師

不知而擊之。乃逸其屬綽克圖巴圖爾宰桑等。率眾百餘內附。時巴拜屬從至。

詔置張家口外。巴拜遣宰桑博克請

賜所屬。

遣官察給之。巴拜尋來朝。請效力禁廷。

諭曰。爾先眾來降。朕自有加恩之處。其仍率所屬駐喀喇沁牧。車稜敗。知噶爾丹不足恃。又羨巴拜內附蒙

恩。遣使秦杜爾伯特部。自始通中國。至阿勒達爾泰。什往來朝請。已五世。前蒙

恩。遣巴札爾傳諭臣屬。功格額爾克。令臣歸誠。許

恩待臣遵

旨降反爲將軍所擊臣懼復逃乞賜

恩綸

諭曰車稜來歸時我綠旗蒙古兵不知而擊之今復遣使奏請理藩院其檄令速降朕將優恤之會遣使招噶爾丹

詔以其使從至則車稜他徙其使齎檄往諭車稜遣功格額爾克奉表降自詣大將軍費揚古所告曰烏蘭布通戰後臣父烏爾袞降志誠不獲達臣前爲大軍擊心甚懼率殘卒十餘奔達瑪爾遇噶爾丹偕赴薩克薩特

呼哩克未浹旬棄走額克阿喇勒臣知噶爾丹罪與之比徒就死聞

上撫厄魯特降人咸得所集臣屬二百五十餘戶內徒道踰汗阿林翁吉閱四月始至乞以此情代奏費揚古馳疏聞留其孥屬于張家口外遣車稜覲

行營

詔授散秩大臣巴拜如之阿喇布坦遣使奏請入貢諭曰朕前聞爾與噶爾丹異處遣使諭爾來降或往依策妄阿喇布坦聽爾自爲計但不得據險竄伏兩無所歸爾遣使諾顏格隆藏布額爾克鄂木布阿旺達什等

奏稱噶爾丹若至近地必擒執之以歸聖主朕又令爾使齎敕往諭雖不能擒殺噶爾丹但束身來歸亦必富貴優養毋疑毋阻今爾稱蒙諭來降卽欲親往入奏借策妄阿喇布坦同牧因臣妻疾甚是以不果往不論所居何地自當請安進貢以此觀之爾無乞降誠意尙爲首鼠兩端耳目今情事爾所灼知丹濟拉車稜等來降朕悉加寵眷策妄阿喇布坦擒伊拉古克三呼圖克圖授朕使令治罪爾欲他往勿復望加爾厚恩顯榮事今憐爾無歸迫于生計欲使得所爾其熟籌之毋貽悔阿喇布坦復不卽降竄齊爾納木初策妄阿喇布坦旣掠

科布多罕都陰語阿喇布坦曰我等當入告

天朝及達賴喇嘛令噶爾丹與策妄阿喇布坦息爭否則善自爲計分處可也阿喇布坦以其謀告噶爾丹罕都懼奔策妄阿喇布坦所罕都兄達都琥子達爾札從之策妄阿喇布坦奪其屬禁罕都及達爾札噶爾丹滅始釋之罕都攜戶百餘乘間脫將爲內附計至齊爾納木懼爲阿喇布坦留棄其屬孛孛大雪中間道赴巴里坤三子皆走死僅以妻女及從者七人行哈密郭帕伯克擒詰得狀遣使導至四月

諭留糧騎及羊九千餘于達希圖海俟青海眾至給之

噶爾直多爾濟設哨布隆吉爾爲其屬阿勒達爾霍什
哈恭格等所煽叛至西欣驛劫駝馬奉母珠木蘇由喀
喇烏蘇遁阿南達遣兵四百追之不及招降其屬茂海
烏訥恩巴圖爾阿喇木札木巴阿喇木班及輝特台吉
羅卜藏等遣歸阿拉善羅卜藏後徙牧喀爾喀卽附札
薩克圖汗部之厄魯特札薩克也和囉理遣達爾漢噶
布楚車臣宰桑等赴青海收諸戚屬抵鎮海堡私向我
守臣乞糧騎不之給訴所屬乏牲畜恐困斃不獲至游
牧

詔給如所請是年和囉理以所部數叛請視四十九旗

例編佐領。廷臣議徙烏喇特界。

諭曰。若將和囉理移牧近地。則沿邊別部蒙古甚多。豈可盡徙。且治蒙古貴得其道。不係地之遠近。若停徙。仍游牧阿拉善地。

詔封和囉理爲多羅貝勒。給札薩克印。轄其衆。復以噶爾賈多爾濟竄赴準噶爾。

敕策妄阿喇布坦曰。噶爾賈多爾濟率屬來降。安置耕種。今忽留其屬人。棄禾私遁。其中必有不得已之情。務卽察明具奏。朕于噶爾賈多爾濟略無責備之意。且降旨收集其遺衆。倘往汝地。汝可善爲撫恤。如欲內徙。卽

行遣歸時噶爾直多爾濟陽附策妄阿喇布坦陰貳之
策妄阿喇布坦將侵哈薩克噶爾直多爾濟詭以兵從
中道遁庫車爲回衆所殺母珠木蘇攜屬九百餘奔青
海青海諸台吉以獻

詔安置什巴爾台隸察哈爾鄂齊爾圖裔自此絕土爾
扈特汗阿玉奇屬諾顏和碩齊色布騰蒙克等從策妄
阿喇布坦使入貢慶捷

優賚遣歸十一月達什巴圖爾偕諸台吉入覲

諭曰朕非威攝爾等前來不過欲令天下生靈各得其
所朕何物不備朕之尊不在爾等來否所望爾等各遂

安全副朕好生至意耳

詔所從諸宰桑咸列坐豫燕以

御用冠服朝珠

賜達什巴圖爾及袞布子朋素克

賞諸合吉鞍馬銀幣有差復傳

諭曰爾等自祖父來歲修職貢故特優錫以寵爾歸十

二月

上大閱玉泉山達什巴圖爾等扈

駕豫觀戰慄失色奏

天朝兵威若此何敵不克博碩克圖濟農以疾不至是

年土謝圖汗察璉多爾濟來朝以土爾扈特台吉恭格
鄂欽車布登三都布等爲祖母弟阿玉奇汗族屬代請
入貢

報可尋

賜牧圖拉河東喀里雅爾山界其地居額爾德尼昭東
北

三十七年正月

詔封達什巴圖爾爲和碩親王諸台吉朋素克

達賴汗弟納

木札勒

卽額爾德尼台吉

爲多羅貝勒額璘沁達什

納木札勒弟朋

素克

哀布子

爲固山貝子根特爾

博碩克圖濟農子

爲輔國公是

役也。袞布以建。達賴喇嘛塔博碩克圖濟農哈坦巴圖爾以疾。色布騰札勒敦多卜達什索諾木達什羅卜藏達爾札幼且避痘。並不獲入覲。羅卜藏達爾札母阿勒達爾表陳其情。

上憫之。

詔特封輔國公。先是噶爾丹詭與青海姻實謀往侵。懼大軍討。乃寢第巴以策妄阿喇布坦不附噶爾丹。陰間之。偽爲達賴喇嘛疏。奏策妄阿喇布坦將侵青海及唐古特。

上斥其妄。會噶爾丹使至。

諭曰青海諸台吉奉貢久。倘若屬犯青海。朕必往討之。至是噶爾丹就滅。策妄阿喇布坦憾達什巴圖爾等內附。詭請大軍征青海。討前助噶爾丹罪。

諭曰青海諸台吉聞朕出師甯夏。遠徙游牧。嗣噶爾丹平定。親來稱慶。伊等並無過端。豈旨遽爲加兵。朕統馭天下。惟願宇內羣生咸獲安堵。豈有使爾等構釁之理。二月。

上幸五臺山。

詔達什巴圖爾等從將旋。

蹕。

召覲行幄。

溫諭遣歸給駝馬。

詔以巴拜車稜屬隸察哈爾正白旗編佐領二車稜屬六品官班丹畢哩克及壯丁百餘以功格額爾克爲驍騎校領之巴拜屬五品官戴和碩齊納木喀琳沁額爾德尼達木巴六品官達爾札巴圖蒙克色稜泰墨爾根伊什德克及壯丁百餘以達木巴領之後巴拜卒無嗣車稜卒子策旺達爾濟嗣。

詔丹濟拉隸察哈爾正黃旗日三品官楚魯克日六品官都喇圖什賁唐古特及壯丁百有十僕役四十皆丹

濟拉屬之來歸者也。以多爾濟色布騰爲佐領。領之。罕都自哈密入覲。

諭曰。爾來歸。情殊可憫。所挈屬衆雖少。以爾父嘗納貢。著授台吉職。先是阿喇布坦屬降者。

詔安置察哈爾牧。曰。四品官噶羅卜藏。曰。二等待衛瑪穆。曰。三等待衛達克巴藏布。及壯丁百七十餘。設佐領一。隸鑲黃旗。以噶羅卜藏領之。至是。

詔罕都與同牧。尋授三品散秩大臣。子二。長索諾木。如罕都職。次阿喇布珠爾。授三等待衛。唐古特部第巴疏。請免解根特爾妻布木理藩院議。噶爾丹罪甚重。其女。

斷不可留青海。若博碩克圖濟農攜至，或可賜生全。今反令第巴代請，仍當檄取。

上從之。博碩克圖濟農尋卒。子察漢丹津嗣。奏噶爾丹女爲臣弟根特爾妻。第巴疏請免解，未蒙

允許。但

聖主優眷，顧實汗子姓，乞以噶爾丹女仍給臣弟，令完聚。

上鑒其情，諭免解，未幾根特爾卒。

三十八年，阿玉奇復遣使額里格克遜等奉表至，歸經準噶爾爲所戕。初策妄阿喇布坦徙博囉塔拉，乞婚阿

玉奇阿玉奇以女妻之。其第三子散札布率屬戶萬五千餘從往。自噶爾丹既滅，策妄阿喇布坦謀并諸衛拉特族，留散札布不遣。阿玉奇索其子，乃逐散札布歸額濟勒，仍留從戶不之給。分隸準噶爾鄂拓克。阿玉奇固索不獲，因構難。

三十九年，哈密札薩克額貝都拉所部偵哈薩克布魯特讐策妄阿喇布坦將興兵爭喀什噶爾，以告。

詔不時偵奏，而策妄阿喇布坦憾哈密擒獻噶爾丹子故掠其屬之赴市吐魯番者。

詔責策妄阿喇布坦罪，準噶爾怨哈密益甚。策妄阿喇

布坦聲言兵擊第巴遣使赴青海陰覘強弱
詔廷臣留意漢趙充國所議五事爲防禦計

四十年察汗丹津來朝

詔封多羅貝勒

四十一年阿喇布坦來歸先是丹津鄂木布旣奔依策
妄阿喇布坦尋爲所禁阿喇布坦懼不赴策妄阿喇布
坦掠其牧乃徙額訥倫果爾集諸宰桑言曰我今決內
面矣遣使訥顏格隆藏布齋奏至乞降

詔允之阿喇布坦挈屬內徙策妄阿喇布坦遣族台吉
大策凌敦多卜羅卜藏琳沁等以兵二千追之阿喇布

坦列兵禦其宰桑洪科爾額爾奇木子車克擊斬羅卜藏琳沁及兵四百餘會我使往迎大策凌敦多卜等遁阿喇布坦率戶七百餘屯茂岱察罕度爾遣洪科爾額爾奇木馳奏

賜御用冠服未幾入覲京師

召見保和殿

諭曰厄魯特歸降我朝未有率人如爾之眾者爾既傾心來歸甚屬可嘉朕所用避風石數珠最利風疾以賜爾阿喇布坦奏臣產絕域無知昔犯天朝每思及心膽俱裂

諭曰爾厄魯特爲人多疑朕親率師至克魯倫遣使諭
噶爾丹來降彼不之從故至交戰失利其時若卽歸款
朕亦卽已前厄魯特來降者朕皆授大臣職爾等尙不
之信今已優養數年各安生全雖未從征立功扈從巡
哨亦嘗盡力今觀爾體貌健壯他日得力可知念爾遠
涉勞乏且善自調攝暇日可更與爾語也

詔封多羅郡王

賜貂裘鞍馬銀幣其從者諾顏格隆藏布洪科爾額爾
奇木皆

賜達爾漢號尋

諭游牧推河阿喇布坦將行奏臣爲策妄阿喇布坦所掠無衣食窮困已極蒙

賜糧畜得更生今來入覲又蒙

恩給食乘傳遣侍衛挈駝馬迎臣甫至輒

賜宴復賞御用珍服及未經見物天高地厚之恩此生誠不能報但期臣身及臣子孫世世捫軀效力而已至臣屬眾志尙未甯俟數年後再請給賜官職編設旗隊允之青海貝勒納木札勒復以牧地乏水草且多疾請徙牧大草灘

諭曰雖四十九旗蒙古未有令游牧內地者所請仍不

允

四十二年

詔授厄魯特多羅郡王阿喇布坦札薩克職尋卒子二
長車稜旺布次色布騰旺布車稜旺布尙郡主授多羅
額駙至是襲郡王爵先是達瑪璘妻布尼塔爾從兄額
璘沁哈什哈至乞降

詔優養之子茂海及車稜從阿喇布坦來歸

詔封茂海爲輔國公達瑪璘阿喇布坦弟也十二月
上幸西安青海親王達什巴圖爾等來朝

詔封和碩特台吉策旺喇布坦爲多羅郡王準噶爾台

吉色布騰札勒爲多羅貝勒策旺喇布坦者達賴巴圖子薩楚墨爾根台吉弟也時爲右翼長色布騰札勒者卓巴巴圖爾子也達什巴圖爾等扈

駕閱駐防兵奏禁卒精練天下無敵外省軍容復如是億萬年可永享昇平

賜宴遣歸

四十三年

上以青海哀布先諸台吉內附

詔封多羅貝勒

封土爾扈特降人阿喇布珠爾爲固山貝子

賜牧色爾騰。初阿喇布珠爾父納札爾瑪穆特從其汗阿玉奇游牧額濟勒河地。逼俄羅斯及準噶爾。阿喇布珠爾嘗假道準噶爾。赴唐古特。謁達賴喇嘛。已爾阿玉奇與策妄阿喇布坦修怨。阿喇布珠爾自唐古特還。以準噶爾道梗。留嘉峪關外。遣使至京師。請內屬。

上憫其窮無所歸。故有是命。使轄其眾。和囉理第三子阿寶尙郡主。授和碩額駙。

賜第京師。

命御前行走。

四十四年。先是青海內附。瑚嚕木什前卒。子哈坦巴圖。

爾以疾不獲與諸台吉入

覲。至是卒。以遺疏授親王達什巴圖爾。稱子達什敦多布幼乞。

賜恤。蓋和碩特八台吉以內附功。授王貝勒貝子公等爵。有差。惟瑚嚕木什及桑噶爾札裔未。

賜爵。達什巴圖爾以聞。且獻哈坦巴圖爾疏。

詔封達什敦多布及桑噶爾札孫敦多布達什爲輔國公。是年貝勒袞布卒。子額爾德尼額爾克托克托爾襲郡王策旺喇布坦卒。子額爾克巴爾珠爾襲。

封丹濟拉爲札薩克輔國公。

四十五年郡王額爾克巴爾珠爾爲諸昆弟所迫自戕
死子朋素克旺札勒降襲貝勒。

諭丹濟拉赴牧推河偕郡王車稜旺布偵防準噶爾丹
濟拉自是不復隸察哈爾旗。

四十八年阿拉善札薩克貝勒和囉理卒子阿寶襲
遣歸游牧。

五十年。

詔封青海台吉噶爾丹達什索諾木達什車稜爲輔國
公索諾木達什者達賴汗弟車稜者索諾木達什弟墨
爾根諾顏子噶爾丹達什者索諾木達什兄多爾濟孫

也。皆鄂齊爾圖裔。鄂齊爾圖爲顧實汗長嗣。世領青海左翼及唐古特衆。故其子姓并

賜爵。拉察布者。墨爾根諾顏子也。亦于是年封輔國公。貝勒納木札勒卒。子羅卜藏察罕襲輔國公。羅卜藏達爾札來朝。

詔晉封固山貝子。尋授盟長。

五十一年。土爾扈特汗阿玉奇使薩木坦等。假道俄羅斯。達京師。表貢方物。

上嘉其誠。且欲悉所部疆域。遣侍讀圖麗琛等齎

敕往。是年夏啟行。秋達俄羅斯境。俄羅斯故導我使紆

道行。

五十一年遣使齎

敕往諭阿玉奇令迎阿喇布珠爾歸使至阿玉奇及納札爾瑪穆特以阿喇布珠爾幸爲

天朝臣僕且俄羅斯假道不易請勿遣歸是年青海輔國公索諾木達什卒子諾爾布朋素克襲

五十三年圖麗琛等始至薩喇托付蓋土爾扈特與俄羅斯界也所部使遠道迎將抵瑪努托海阿玉奇復遣台吉宰桑等導至拂廬我使授

敕宣諭訖語之曰阿喇布珠爾已

賜爵優養。欲遣歸爾牧。以策妄阿喇布坦惡爾。恐戕之。而詭以哈薩克哈喇哈爾榜爲辭也。爾若欲令阿喇布珠爾歸。當自俄羅斯來迎。阿玉奇曰。我雖外夷。然冠服與中國同。俄羅斯乃嗜欲不通。言語不同之區也。若以往來數故。不假我道。則我無由入中國矣。阿喇布珠爾幸荷。

厚恩。與歸土爾扈特等。復何疑慮。鄂齊爾圖妻聞。我使至。泣告所部未破時。嘗往來納貢狀。阿玉奇妻達爾瑪巴拉子沙克都爾札布及阿喇布珠爾父納札瑪穆特等。各贈馬及方物。我使以入境。無私交辭。阿玉奇待之。

有隆禮。留旬餘。筵宴不絕。復附表奏謝。

五十四年春。圖麗琛等復

命退而著異域錄。述其道里山川。民風物產。以及應對禮儀。所歷俄羅斯境。曰楚庫柏興。曰烏的柏興。曰柏海爾瑚。曰尼爾庫城。曰昂噶拉河。曰伊聶謝柏興。曰麻科斯科。曰揭的河。曰那里本柏興。曰蘇爾呼忒柏興。曰薩瑪爾斯科。曰狄木演斯科。曰托波爾。曰鴉班沁。曰費耶爾和土爾斯科城。曰費耶爾和土爾斯科。佛洛克嶺。曰索里喀穆斯科。曰改果多羅。曰墨林諾付。曰喀山。曰西穆必爾斯科。曰薩拉托付。曰喀喇斯科。曰托穆斯科。曰

伊里木城。皆其聚落也。其地爲自古輿記所不載。亦自古使節所未經。如史記述匈奴北海。頗作疑詞。故儒者類言無北海。今據圖理琛所記。知伊聶謝柏興。距北海大洋一月程。又唐書稱薛延陀夜不甚暗。猶可博奕。僅得之于傳聞。圖理琛以五月至其地。知夏至前後。確有是事。準噶爾策妄阿喇布坦。自噶爾丹滅後。極恭順。至是漸驕橫。四月。以兵二千。掠哈密。甘肅提督師懿德。檄總兵路振聲往救。且入奏。

詔西安將軍席柱。及提督師懿德。帶兵星速救應。吏部尙書富甯安前往。與將軍公同商酌而行。祁里德授爲

散秩大臣前赴推河。

詔右衛將軍宗室費揚古率右衛察哈爾歸化城黑龍江索倫達呼爾喀喇沁鄂爾多斯兵赴推河駐札阿拉善貝勒阿寶率所部兵五百參贊軍務青海左翼設兵備阿喇布珠爾備兵聽調準噶爾尋敗遁議撤噶斯駐防兵以青海貝勒達顏所屬台吉等游牧柴達木通噶斯之察罕齊老圖。

遣侍衛等駐其地偵準噶爾蹤。

遣使由喀爾喀哈密兩路齎

敕往諭策妄阿喇布坦。

詔阿寶仍以參贊偕其兄子鎮國公羅卜藏達爾濟往會西安將軍席柱等駐巴里坤。襲擊準噶爾于伊勒布爾和碩阿克塔斯烏嚕木齊諸地。皆克捷。七月。議費揚古在察罕托輝札布堪河特斯河一帶屯田。富甯安在西吉木布隆吉爾等處屯田。九月。

諭富甯安回肅州。料理軍需錢糧。初達賴汗子拉藏偕青海諸台吉定議內附。尋襲唐古特汗。以第巴私立偽達賴喇嘛襲殺之。而立博克達之伊西札穆蘇爲達賴喇嘛。瑚畢勒罕。青海貝勒察罕丹津等訐其僞。奏裏塘之羅卜藏噶勒藏嘉穆錯爲真達賴喇嘛。瑚畢勒罕。

詔內閣學士拉都琥往驗尋

遣侍衛阿齊圖召青海兩翼議徙裏塘達賴喇嘛畢勒罕以弭爭端貝勒色布騰札勒阿喇布坦鄂木布朋素克旺札勒台吉達顏索爾札等僉請徙察罕丹津不從將偕達什巴圖爾子羅卜藏丹津盟率兵攻異已者阿齊圖疏至王大臣等奏察罕丹津若先攻諸部色布騰札勒等來奔應置邊內察罕丹津牧距松潘僅四五日程請備兵待

詔西南四川松潘諸路設兵備之有曼濟者從準噶爾攻哈密被擒訴土爾扈特屬留處準噶爾爲宰桑等虐

思附

天朝或歸故土但不獲間。

上憫之。諭策妄阿喇布坦遣歸土爾扈特牧。不從。

詔招降杜爾伯特台吉丹津于阿爾台。丹津者鄂木布岱青和碩齊孫也。與散秩大臣車稜爲從昆弟。游牧阿爾台。戶千餘。和託輝特台吉博貝誘赴阿爾台。招丹津降。抗卽以兵取之。

諭車稜遣使齎書從。比至。丹津徙策妄阿喇布坦牧。五十五年三月。

詔青海貝勒朋素克旺札勒台吉達顏各選兵百屯噶

斯路防準噶爾賊土爾扈特阿喇布珠爾奏請從軍效力。

詔率兵五百駐噶斯。察罕丹津畏罪。徙裏塘達賴喇嘛。瑚畢勒罕至西甯宗喀巴寺。阿齊圖奏請集諸台吉定盟。以羅卜藏丹津察罕丹津達顏等領右翼。額爾德尼額爾克托克托爾阿喇布坦鄂木布等領左翼。令永睦允之。會準噶爾由沙拉襲青海。掠台吉羅卜藏丹濟卜等牧畜。復謀盜噶斯口官軍駝馬。

諭曰。準噶爾偵噶斯口兵勢稍弱。潛來侵擾。青海不可不嚴備之。著西安兵會青海左翼。四川督標兵會青海

右翼協力防禦。閏三月，以議遷達賴喇嘛瑚畢勒罕事定。

詔青海貝勒額爾德尼額爾克托克托爾等分領青海左翼，台吉達顏等分領青海右翼。先是親王達什巴圖爾爲和碩特長，以私憾誣訐達顏罪。

詔禁京師，以其叔父策旺喇布坦代轄所屬，尋策旺喇布坦來朝，乞宥達顏罪，攜歸青海。

允之。有番族日瞻對，在鴉籠江西境，其祖爲喇瑪什喇札木禪明，成化中入貢，給之印，再傳至多爾濟布木子二。長革松撒，次按撒，不相能。革松撒子琳沁布及孫側

冷旺布屯牧瞻對。技撒攜子側冷札布徒奔霍爾。附青海說其右翼長多爾濟以兵侵瞻對。掠屬番二千餘戶。側冷旺布女弟之夫曰喇瑪布屯牧喇袞與定謀內附。納其土及民數。瞻對屬番三千戶。喇袞屬番千戶。且獻明所給印。會策旺喇布坦遣宰桑札爾瑚齊等取霍爾賦。使以私至打箭鑪。詭稱多爾濟及子薩楚墨爾根孫達顏相繼征瞻對賦。瞻對久爲青海屬。請勿納。我守汛臣遣書詰之。策旺喇布坦稱宰桑辭誣。且謝罪。

詔授側冷旺布及喇瑪布官。爲內屬。卽隸泰甯協阜和營之瞻對喇袞二安撫司也。策旺喇布坦卒。妻額琳沁

旺布謀奪霍爾諸地。達顏以策旺喇布坦恤育恩弗爭也。側冷札布忌側冷旺布等內附。攘附牧地。

遣官往勘。知霍爾爲達顏屬。

飭額琳沁旺布給之復。

諭達顏遣使霍爾察歸所攘瞻對地。以宰桑等監之。令番族勿滋擾。達顏奉命惟謹。十一月。

諭明年暫停進兵。十二月。達顏來朝。

諭曰。達顏爲達賴巴圖爾孫。且素樸誠。感戴朕恩。實心效力。辦理青海事務。始終毫無舛誤。朕甚嘉之。著封多羅貝勒。青海準噶爾台吉阿喇布坦來朝。

詔授公品級一等台吉。阿喇布坦卓哩克圖和碩齊孫也。初和碩特與準噶爾族世婚。察罕丹津弟根特爾旣以噶爾丹女布木爲妻。阿喇布坦爲噶爾丹從子。察罕丹津復以女妻之。噶爾丹旣平。準噶爾族不附逆者。詔仍游牧青海。聽和碩特族與姻好如故。然皆未編設旗隊。至是。

賜阿喇布坦札薩克職。轄其屬。給銀幣如公例。是年輔國公拉察布晉封固山貝子。

五十六年正月。達顏奏請增設噶斯兵防準噶爾。上聽其言。以西安兵二千。西甯兵一千。益之。二月。扈

蹕幸畿甸。

優賚遣歸三月。

命富甯安爲靖逆將軍。由巴爾庫爾

卽巴里坤

一路。公傅爾

丹爲振武將軍。祁里德協理將軍。由阿爾台一路。襲擊

準噶爾。遣使赴青海。測分野。未幾。靖逆將軍富甯安謀

策妄阿喇布坦。遣兵赴唐古特。馳疏聞。初。拉藏汗有子

三。長噶爾丹丹忠。次索爾札。次色布騰。策妄阿喇布坦

偵拉藏汗嗜酒無謀。以女博托洛克爲噶爾丹丹忠婦。

誘之來娶。留不遣。西域謂善巫蠱者曰鮮荅。噶爾丹丹

忠習其術。策妄阿喇布坦誘縛之。夾兩金間烙死。遣兵

六千襲藏。詭稱送噶爾丹丹忠及博托洛克歸。

上以裏塘達賴喇嘛畢勒罕事初定。拉藏汗或陰導
準噶爾侵青海。

詔理藩院尙書赫壽諭拉藏汗。勿得與察罕丹津羅卜
藏丹津等構兵復。

諭遣侍衛色楞等赴青海。曰。準噶爾若侵拉藏汗。爾卽
與青海台吉等定議協剿。務令絕無猜忌。不至滋變。方
善。或拉藏汗導準噶爾侵青海。爾卽諭察罕丹津等曰。
策妄阿拉布坦屢抗大軍。今拉藏汗與同謀。是顯爲讐
敵也。聖主始終仁愛。保護顧實汗子孫。爾等正當奮志。

報效而行。六月富甯安等由巴爾庫爾進發。七月散秩大臣阿喇納至烏蘭烏蘇拿獲策妄阿喇布坦哨兵二人。富甯安自烏魯木齊回兵向畢留閣遇厄魯特三百餘人整兵迎剿。賊敗奔深山。我輝特台吉札木畢陣亡。又至烏魯木齊拿獲回子探問準噶爾消息。前進至通俄巴錫拿獲回子男婦一百六十九名。并駝馬牛羊等物。將各處田禾俱行踐踏。回巴爾庫爾。傅爾丹派兵至博羅布爾哈蘇。追斬厄魯特五人。擒四人。又遣人分路尋掠。並無賊蹤。亦回兵阿爾台。十月。

命侍郎梁世勳海壽督理巴爾庫爾屯田。

命副都統法喇往四川會同年羹堯料理軍需察罕丹津等以準噶爾侵拉藏汗告

諭內大臣策旺諾爾布西安將軍額倫特侍衛阿齊圖等分屯青海要地議政王大臣等并請檄松潘西甯兵備邊

詔遣侍衛拉什偕察罕丹津定議

五十七年拉藏汗乞援疏至先是準噶爾策凌敦多卜率眾由特幾斯踰淨科爾庭山拉藏汗不之備賊至達木始覺偕子索爾札拒不敵奔守布達拉遣使齎疏乞援賊誘開布達拉門入戕拉藏汗拘色布騰及宰桑等

三
索爾札率兵三十餘潰走爲所擒其妻問道來奔皆五
十六年事至是疏始至

詔色楞等會青海王察罕丹津議進兵察罕丹津奏大
兵將赴藏準噶爾必不敢潛至青海請仍撤松潘等處
兵入口收馬休卒

上遵其言尋知拉藏汗被準噶爾戕復
遣侍衛札卜密

諭察罕丹津謀誘準噶爾兵至青海擊之準噶爾懼不
至時準噶爾賊五百謀侵察木多察罕丹津詭遣宰桑
迎赴裏塘都統法喇疑與賊應劾其罪

詔傳諭察罕丹津所遣宰桑侯準噶爾賊至偕駐防禦
塹兵禦之六月總督額倫特統兵自穆魯烏蘇起程至
圖爾哈爾渡河至七又河間侍衛色楞自拜圖前往因
七又河至拜圖無路可通自七又河向庫庫塞一路進
兵七月額倫特自門贊西里克起程至齊諾郭勒連敗
賊兵追擊十餘里訊獲賊稱賊首札布齊杜喀爾二人
帥兵四千由喀喇烏蘇河西小路而來額倫特卽移咨
公策旺諾爾布接應遂渡喀喇烏蘇前往狼臘嶺侍衛
色楞亦統兵至喀喇烏蘇連擊敗厄魯特賊人奪其三
處山梁追殺二十里殺二百餘人九月額倫特色楞與

賊兵遇相持月餘額倫特沒于陣。

命皇十四子固山貝子允禩爲撫遠大將軍。十二月撫遠大將軍帥大兵進剿策妄阿喇布坦起程。察罕丹津尋來朝。

諭曰。人心疑懼之際。爾能委身效順。甚屬可嘉。著晉封多羅郡王。歸牧。請從大軍赴藏。

詔撫遠大將軍固山貝子允禩善視之。且以兵護其牧。貝勒達顏卒。

上悼唁之子旺舒克喇布坦襲。

五十八年四月。議今年暫停進兵。撫遠大將軍兵暫在

西甯駐札。從允禪請也。先是哈密伯克額貝都拉獻西吉木達里圖西喇郭勒地。

詔設赤金靖逆二衛。及柳溝所。聽兵民耕牧。尋以其地錯青海左翼牧。

遣官偕貝子阿喇布坦台吉阿爾薩蘭等。勘定界。阿喇布坦等曰。青海衆荷

厚恩。何惜隙地。可耕者。聽給軍民。留我等牧地足矣。因集所屬宰桑等。畫地標識。議勿私越。時撫遠大將軍允禪統兵駐西甯。請自索諾木至柴達木路。設站五。站置青海兵十。別令左右翼兵各三百。屯近軍地。防準噶爾。

賊

從之。六月，都統法喇遵

旨，令副將岳鍾祺率綠旗兵赴裏塘，擒其酋七人，斬之。
隨宣

諭安撫，又進取巴塘。法喇移兵駐札巴塘，尋就撫。八月，
議茂岱察罕度爾與鄂齊圖果爾二處各築一城，將充
發者，暫住耕種。俟一年後，派兵駐防。從振武將軍傅爾
丹請也。允。禮復遵

旨。集兩翼王公台吉以

上意宣諭曰：唐古特部達賴喇嘛班禪喇嘛法教原係

爾祖顧實汗所設。今準噶爾戕拉藏汗離散番衆。爾等
前稱裏塘羅卜藏噶勒藏嘉穆錯。爲真達賴喇嘛胡畢
勒罕。願置禪榻。廣施法教。今唐古特民人及阿木嶼喇
嘛如爾言。

皇上爲安藏計。遣大兵送往唐古特。爾等宜率所屬兵
或萬或五六千。從往。其定議具奏。兩翼王台吉等僉稱
願聽命。

五十九年正月。授都統宗室延信爲平逆將軍。和碩額
駙阿寶自巴里坤赴青海。參贊其軍。二月。授護軍統領
噶爾弼爲定西將軍。率兵進藏。調都統法喇於打箭鑪。

駐防三月富甯安言今歲大兵進藏其阿爾泰巴爾庫爾兩路亦約會前進襲擊準噶爾邊境使賊人擾亂臣請率兵三千從烏魯木齊往分兵四千由吐魯番往尋議吐魯番一路兵令散秩大臣阿喇納統領征西將軍那里德言阿爾泰兵臣請領七千人從布婁爾前進將軍傅爾丹領八千人從布喇罕前進襲擊準噶爾邊境從之七月富甯安選輕騎至烏蘭烏蘇之源及託和穆圖遣侍衛哲爾德等赴阿克塔斯擒一賊餘衆逃散侍衛克什圖阿玉錫等赴伊勒布爾和碩奪馬百餘獲杜爾伯特台吉垂木拍爾杜爾伯特台吉丹津之徙收準

噶爾也。時策妄阿喇布坦假兵力，據四衛拉特，令諸台吉、瓌、牧、烏、嚕、木、齊、額、爾、濟、斯、爲負嵎計。垂木拍爾者，丹津族台吉也。率屬駐烏嚕木齊，設哨伊勒布爾和碩、阿克塔斯路。至是爲我軍所擒。烏嚕木齊衆聞之，咸竄。阿喇納進兵齊克塔木，擊破賊營，悉降其衆。進至皮禪城，諭降其回子三百餘人。至吐魯番，其頭目阿克蘇爾坦及總管沙克札拍爾等率衆迎降，乃凱旋富甯安。至烏嚕木齊，並無賊蹤。與阿喇納會于烏爾烏蘇，合兵凱旋。九月，抵巴爾庫爾，祁里德自鑑額爾河前進，擊敗厄魯特宰桑色布騰、色布騰，率二千餘人降。獲牲畜無算。傅

爾丹至格爾額格厄魯特人委棄帳房逃散追及之殺二百餘人擒宰桑貝坤等百餘人降三百餘人又督兵踐踏烏蘭呼濟爾耕種焚所積糧草而還八月噶爾弼自拉里前進分兵三隊進取西藏傳集大小第巴頭目並各喇嘛廟宣示拯救至意隨將達賴喇嘛倉庫封鎖其堪布等將各廟準噶爾喇嘛百餘人擒獻斬爲首喇嘛五人餘監禁平逆將軍延信擊敗策凌敦多卜之眾于札卜克河奪其馬匹器械又敗賊二千餘人于齊諾郭勒又敗賊于綽瑪喇九月自達木起程送新封達賴喇嘛進藏青海王公台吉皆從捷聞

詔留兵二千屯青海偵禦富甯安請乘勝來年大舉進剿。

許之。是年封博碩克圖濟農孫阿喇布坦札木素爲輔國公。

六十年三月大將軍允禔言據三路將軍報稱各路馬駝糧餉俱甚充足器械俱已齊備官兵各思奮力值策妄阿喇布坦人心惶惑之時可以直擣巢穴掃蕩無遺。尋會議阿喇納提督路振聲由烏蘭烏蘇進取吐魯番富甯安之兵調往烏蘭烏蘇駐札。傅爾丹祁里德各于本處豫備再派祁里德所屬兵二千前往收取策妄阿

喇布坦及烏梁海逃眾俟策妄阿喇布坦內變起釁得有確信三路將軍卽引大兵前進搗其巢穴從之五月

命大將軍允禔赴甘州駐札

諭今年大兵暫停進剿從允禔密奏也九月策妄阿喇布坦遣人犯吐魯番城阿喇納使侍衛克什圖等敗之擒殺百餘人追捕數十里獲軍械馬匹甚多富甯安言臣前因阿喇納今冬進兵襲擊故請移駐伊勒布爾和碩爲之聲援今賊人已敗遁必恐懼防備不宜襲擊阿喇納應停止進兵臣仍統兵駐巴爾庫爾

從之十月

召允禩祁里德富甯安來京

指示明歲大舉進剿方略祁里德言烏蘭固木地煖土肥請來年多行耕種可望大收從之

詔阿寶統兵五百駐藏地參贊署理定西將軍公策旺諾爾布軍